

Կ Ա Ր Ծ Ի Ք

**ԳԵՎՈՐԳ ՀԱՐՈՒԹՅՈՒՆԻ ՔԵՇԻՇՅԱՆԻ «ՏՆՏԵՍԱԿԱՆ ԱՃԻ ՎՐԱ
ԳՈՐԾԱԶՐԿՈՒԹՅԱՆ ՄԱԿԱՐԴԱԿԻ ԱԶԴԵՑՈՒԹՅԱՆ
ՏՆՏԵՍԱՎԻՃԱԿԱԳՐԱԿԱՆ ՎԵՐԼՈՒԾՈՒԹՅՈՒՆԸ ՀՀ ՕՐԻՆԱԿՈՎ» ԹԵՄԱՅՈՎ
ԱՏԵՆԱԽՈՍՈՒԹՅԱՆ ՎԵՐԱԲԵՐՅԱԼ, ՆԵՐԿԱՅԱՑՎԱԾ Ը. 00.03. «ՖԻՆԱՆՍՆԵՐ,
ՀԱՇՎԱՊԱՀԱԿԱՆ ՀԱՇՎԱՌՈՒՄ» ՄԱՍՆԱԳԻՏՈՒԹՅԱՄԲ
ՏՆՏԵՍԱԳԻՏՈՒԹՅԱՆ ԹԵԿՆԱԾՈՒԻ ԳԻՏԱԿԱՆ ԱՍՏԻՃԱՆԻ ՀԱՅՑՄԱՆ ՀԱՄԱՐ**

Երկրում իրականացվող սոցիալ-տնտեսական քաղաքականության հիմնական թիրախներից մեկը տնտեսական աճի ապահովումն է, որը կարևոր նախապայման է հանդիսանում տնտեսական զարգացման, լրացուցիչ պետական եկամուտների գեներացման, բնակչության բարեկեցության մակարդակի բարձրացման և մի շարք այլ տարաբնույթ խնդիրների լուծման համար: Այս տեսանկյունից, տնտեսական աճի ապահովմանն ուղղված քաղաքականության մշակումն ու իրականացումը, նախ և առաջ, ենթադրում է դրա վրա ազդող գործոնների համակողմանի ուսումնասիրություն: Վերջիններիս շարքում հատկապես առանձնահատուկ է գործազրկության մակարդակը, որի աճն ուղղակի բացասական ազդեցություն ունի տնտեսական աճի վրա: Հետևաբար, աշխատանքի շուկայի համակողմանի վերլուծությունը, զբաղվածության ոլորտում առկա հիմնախնդիրների բացահայտումը և դրանց լուծմանն ուղղված մոտեցումների մշակումը կարևորագույն նախապայմաններ են հանդիսանում երկրում տնտեսական աճի ապահովման համար: Ընդ որում, դրանց արդյունավետ լուծմամբ է մեծապես պայմանավորված երկրի տնտեսական զարգացումը և բնակչության կենսամակարդակի բարձրացումը:

Գրախոսվող ատենախոսությունը նվիրված է աշխատանքի շուկայում գործազրկությունը բնութագրող ցուցանիշների, ինչպես նաև այն կրճատող գործոնների համալիր վիճակագրական վերլուծության միջոցով տնտեսական աճի վրա գործազրկության մակարդակի ազդեցության գնահատմանը, որով էլ

պայմանավորված է ընտրված թեմայի **արդիականությունը** և բարձրացված խնդիրների լուծման **հրատապությունը**:

Կառուցվածքային առումով հետազոտությունն իրականացված է ատենախոսությունում բարձրացված հիմնահարցերի և դրանց հետ կապված խնդիրների լուծման տրամաբանական հաջորդականության ապահովման սկզբունքով: Նախաբանում հիմնավորված են հետազոտության արդիականությունը և ստացված արդյունքների գործնական ներդրման հրատապությունը, դրված է հետազոտության հստակ նպատակը և բացահայտված են դրան հասնելու հիմնական ուղիները:

Ատենախոսության **առաջին գլուխը** նվիրված է գործազրկության՝ որպես վիճակագրական հետազոտության օբյեկտի ուսումնասիրությանը, տնտեսական աճի տեսական հիմքերի և այն բնութագրող ցուցանիշների վերլուծությանը, գործազրկության մակարդակի և ՀՆԱ-ի աճի տեմպերի միջև եղած կապերի տեսական հիմնավորմանը:

Հետազոտության **երկրորդ գլխում** իրականացվել են գործազրկությունը բնութագրող հիմնական ցուցանիշների և ՀՀ մարզերում և Երևանում գործազրկության ցուցանիշների դինամիկայի ու դրանց կառուցվածքային տեղաշարժերի վիճակագրական վերլուծություններ:

Աշխատանքի **երրորդ գլխում** ուսումնասիրվել են տնտեսության հիմնական ոլորտներում գործազրկությունը կրճատող և տնտեսական աճը խթանող գործոնները, գնահատվել է տնտեսական աճի վրա գործազրկության մակարդակի ազդեցություն, ինչպես նաև գործազրկության մակարդակի և տնտեսական աճը բնութագրող հիմնական ցուցանիշների ներտարեկան համատեղ տատանումների ուսումնասիրության հիման վրա կատարվել են կանխատեսումներ:

Աշխատանքի կառուցվածքը հնարավորություն է տվել հեղինակին նախապես հիմնավորել ատենախոսության թեմայի ընտրությունը, այնուհետև բացահայտել դրված հիմնահարցերի լուծման հիմնական ուղղությունները և մշակել դրանց իրականացման մեթոդաբանական և մեթոդական հիմքերը:

Հետազոտության արդյունքների **հավաստիությունը** պայմանավորված է նրանով, որ աշխատանքում մշակված մոտեցումները հիմնված են դիտարկվող հիմնահարցն ուսումնասիրող հեղինակավոր մասնագետների աշխատությունների վրա, իսկ որպես տեղեկատվություն օգտագործվել են հիմնականում պաշտոնական և վիճակագրական նյութեր ու տվյալներ:

Աշխատանքի **գիտական նորույթը** կայանում է նրանում, որ բացահայտվել է գործազուրկների տարիքի և անավարտ գործազրկության տևողության միջև եղած փոխադարձ կապը և հիմնավորվել է դրանց համատեղ ազդեցությունը գործազրկության մակարդակի վրա, գնահատվել և կոռելյացիոն պլեյադաների միջոցով ներկայացվել է աշխատուժի առաջարկի և պահանջարկի հիմնական ցուցանիշների շղթայական ազդեցությունը գործազուրկների թվաքանակի և գործազրկության մակարդակի կրճատման և տնտեսական աճի վրա, գործազրկության մակարդակի և հիմնական մակրոտնտեսական ցուցանիշների միջև փոխկապվածությունների բացահայտման արդյունքում վեր է հանվել գործազրկության պաշտոնական տվյալների միջև եղած տարբերությունների օրինաչափությունը, տնտեսական կայուն զարգացման գնահատման ինտեգրալ ցուցանիշի վրա գործազրկության մակարդակի և տնտեսական աճի դինամիկայի ազդեցության վերլուծության արդյունքում բացահայտվել է ՀՀ բնակչության բարեկեցության վրա նշված գործոնների ազդեցությունը, բացահայտվել է գործազրկության մակարդակի և բնակչության մեկ շնչի հաշվով ՀՆԱ-ի միջև եղած փոխկախվածության առանձնահատկությունները, ՀՆԱ-ի ծավալների և գործազրկության մակարդակի փոխկապակցված շարքերի վերլուծության հիման

վրա պարզաբանվել է սեզոնային տատանումների բնույթը, և ժամանակային շարքերի տարբեր բաղադրիչների հիման վրա տրվել են կանխատեսման միջակայքային գնահատականները առաջիկա տարիների համար:

Հետազոտության արդյունքները գիտության համար ներկայացնում են որոշակի արժեք: Աշխատանքում մշակված մոտեցումները, արված առաջարկություններն ու ընդհանրացումներն ունեն **տեսական և գործնական** նշանակություն: Հեղինակի կողմից ստացված արդյունքները թույլ են տալիս համոզվելու, որ դրանց գիտագործնական կիրառության շրջանակները կլինեն բավականաչափ լայն և կնպաստեն հանրապետության տնտեսական վերելքին:

Ատենախոսությունը զերծ չէ **դիպողություններից**: Դրանցից կարելի է նշել հետևյալները:

1. Ակնհայտորեն, երկրում առկա գործազրկության մակարդակն իր անդրադարձն է ունենում բնակչության սոցիալական վիճակը բնութագրող ցուցանիշների վրա: Գործազրկության սոցիալական հետևանքների գնահատման ժամանակ հեղինակի կողմից ներկայացված են վերջին տարիներին հանրապետությունում արձանագրված սոցիալական ցուցանիշները: Բարձր գնահատելով այդ ուղղությամբ հեղինակի վերլուծությունները, միաժամանակ, կարծում ենք, որ չի կարելի միանշանակ պնդել, որ այդ ամենը պայմանավորված է եղել գործազրկությամբ:

2. Հանրապետությունում ստվերային տնտեսության և թաքնված զբաղվածության մեծ ծավալներով պայմանավորված, կարծում ենք, որ աշխատանքի շուկայի կարգավորման ուղղությամբ առաջարկությունների և՛ մոտեցումների մշակման ընթացքում պետք է առավելագույնս հաշվի առնվեր նշված հանգամանքը, քանի որ հակառակ պարագայում որոշակիորեն խեղաթյուրվում է տվյալ ոլորտի իրական պատկերը, հետևաբար նաև՝ նվազում կատարված առաջարկությունների արդյունավետությունը:

3. ՀՀ-ում բնակչության զբաղվածության ապահովմանն ուղղված քաղաքականությունը, չնայած պետական ֆինանսավորման որոշակի ծավալներին, անցած ժամանակահատվածում աչքի չի ընկել իր արդյունավետությամբ՝ որոշակիորեն նպաստելով պետական բյուջեից կատարված հատկացումների փոշիացմանը: Այս առումով, կարծում ենք, որ աշխատանքը կշահեր, եթե հեղինակի կողմից առավել խորը ուսումնասիրության ենթարկեին պետական բյուջեից կատարվող հատկացումների և ակնկալվող արդյունքերի միջև որոշակի հարաբերակցության ապահովման հարցերը:

ԵԶՐԱԿԱՑՈՒԹՅՈՒՆ

Արված դիտողությունները չեն նսեմացնում հետազոտության արդյունքները: Դրանք հետապնդում են տնտեսական աճի վրա գործազրկության ազդեցությանը նվիրված հետազոտ ուսումնասիրությունների ուղղությունների բացահայտման նպատակ:

Գ. Քեշիշյանի թեկնածուական ատենախոսությունն իրենից ներկայացնում է ինքնուրույն, ամբողջական և արժեքավոր հետազոտություն, որում դրված և լուծված են ՀՀ համար խիստ կարևոր ու արդիական խնդիրներ:

Հեղինակի մասնագիտական ու վերլուծական մակարդակը բարձր է, ինչի մասին են վկայում ինչպես ատենախոսությունը, այնպես էլ դրանում ստացված արդյունքները: Աշխատանքում մշակված առաջարկությունները և կատարված՝ եզրահանգումները կարող են լայնորեն օգտագործվել տնտեսական աճի ապահովմանն ուղղված քաղաքականության մշակման ու իրականացման գործընթացում:

Հետազոտության հիմնական արդյունքները հրապարակված են: Ատենախոսության սեղմագիրը համապատասխանում է ուսումնասիրության

բովանդակությանը և արտացոլում աշխատանքի կարևորագույն դրույթներն ու արդյունքները:

Ընդհանուր առմամբ, Գ. Քեչիշյանի «Տնտեսական աճի վրա գործազրկության մակարդակի ազդեցության տնտեսավիճակագրական վերլուծությունը ՀՀ օրինակով» թեմայով ատենախոսությունը համապատասխանում է «Հայաստանի Հանրապետության գիտական աստիճանաշնորհման կանոնակարգի» 6-րդ և 7-րդ կետերի, ինչպես նաև թեկնածուական ատենախոսություններին ներկայացվող պահանջներին, իսկ դրա հեղինակն արժանի է Ը.00.03- «Ֆինանսներ, հաշվապահական հաշվառում» մասնագիտությամբ տնտեսագիտության թեկնածուի գիտական աստիճանի շնորհմանը:

ՊԱՇՏՈՆԱԿԱՆ ԸՆԴԴԻՄԱԽՈՍ՝
տնտեսագիտության դոկտոր, պրոֆեսոր

Վ. ԲՈՍԱՆՋՅԱՆ

17.07.2020թ.

Պարոն Վ. ԲՈՍԱՆՋՅԱՆԻ
ստորագրությունը հաստատում եմ՝
պ. գ. թ.
ԵՊՀ գիտական քարտուղար



Լ. ՀՈՎԱՍԵՓՅԱՆ

17.07.2020թ.